

nos neceffitez, puis qu'il ne pouuoit affez reconnoître les obligations qu'il nous auoit de luy auoir donné la connoiffance de la Foy, & de l'auoir rendu Chrestien. Il fe nomme Charles Ondaaiondiont.

Depuis fept ans qu'il est Chrestien, il n'a manqué qu'une feule fois à entendre la Meffe, lors qu'il a esté icy dans le pays, encore n'y auoit-il pas de fa faute, & toutesfois il en eut vn bien grand fcrupule; difant qu'estant ordinairement tout l'Esté ou dans les guerres, ou en voyage, il ne se foustient que sur les prouifions & des merites & de vertu, qu'il doit tafcher de faire tout le long de l'Hyuer qu'il en a la [92] commodité. Mais brifons ce Chapitre, car les sentimens de ces bons Chrestiens n'ont point de fin, & ce fera fans doute dans le Ciel, où nous benirons Dieu des graces qu'il leur fait, & où nous verrons qu'il n'a pas moins esté leur Createur, leur Redempteur, leur Pere, & tout Amour pour eux, que pour les peuples de l'Europe. *Domini est terra & plenitudo eius, orbis terrarum & vniuersi qui habitant in eo.*